

PM Xanana: Australia arogansia no laiha moral

Segunda, 09 Dezembru 2013 15:19 | Hakerek nain Santino Dare Matias



Radio, online – Primeiru Ministru (PM), Kay Rala Xanana Gusmão ho prinsipiu defende riku soin TL nian, dehan, hahalok intelenjia militar Australia nian hodi ba hadau dokumentus no prende pasaporte testamunha ba kazu CMATS, hahalok Australia nian ne'e arogansia no laiha moral.

PM Xanana kasu lia hirak ne'e hafoin fila husi Sudan Sul, iha Aerportu Internasional, Nicolao Lobato Sabadu, (7/12).

PM Xanana dehan, foin dadauk iha Bali Democratik Forum, PM Xanana iha nia diskursu hodi afirma katak, demokrasia laos hanesan, tenki fo regras hodi ejiji nasaun foun no nasuan

sub-dezenvolidu tenki halo tuir hotu, ida nee mak dehan demokratiku. Tuir Xanana ne'e lao los.

PM Xanana mos lamenta ho nasaun boot sira no riku obriga nasaun kiik sira tenki halo tuir tratadu no konvensoens sira. Maibe, hare didiak iha nasaun bobot sira agora dadaun infrenta problemas barak. PM Xanana husu nasaun boot sira tenki fo ezemplu diak.

Hare ba kazu CMATS nian ne'ebe Australia halo ba testamunha TL nian, tuir eis gerileirus ne'e dehan, TL monu iha Australia ninia rai hanesan rai henek musan ida, monu iha tasi ibun. Ne'ebe mak la sente katak, uza fali intelejensia militar atu esplora mai TL ne'ebe seidauk iha kbi'it no seidauk iha preparasaun.

PM Xanana dehan, tuir lolos problemas nee atu tur hodi koalia ba malu, TL nia pozisaun husu bebeik atu tur hamutuk. Maibe governu Australia lakoi simu tur atu koalia, ho ida ne'e mak PM Xanana hakerek karta ofisial dehan, see governu Australia lakoi tuir koalia entaun dalan dok, ba hasoru malu iha tribunal. Ho ida ne'e mak nasaun TL ho Australia prepara ekipa hodi lao too ohin loron.

"Ita nia advogado ne'ebe ita konfiansa, ema ida ne'ebe hau bele dehan advogado top, laos biasa hela, ema hotu no mundu tomak koinese. Advogadu ne'e dehan, sim bele lori ba tribunal, hau pruntu lori kazu ne'e ba oin,"PM Xanan esplika.

Antes ne'e PM Xanana liu husi ninia karta ofisial ba iha governu Australia atu tur koalia konaba kazu maritime, hodi husu governu Australia tenki tur ho TL hodi deskuti, tanba iha asuntu balun ne'ebe sala. Maibe governu Australia ho nia arogante katak, tratadu ne'e los ona. Ho razaun hirak ne'e mak lori malu to'o ba tribunal Internasional iha Deng Haag, Olanda.

"Ba ami TL, relasaun ho Australia lao nafatin, maibe ita iha problema mai ita tur hodi resolve. Ita la kahur, tanba povu TL laos irasional. Laos hanesan iha nasaun seluk sunu bandeira. Povu TL nee, povu edukadu,"PM Xanana komenta.

PM Xanana agora dadaun ba oin, tau preokupasaun konaba TL nia testamunha. Testamunha laiha, bele mosu inventa.

Lolos ne'e, iha dia 5 de Dezembru tinan ne'e, tribunul Internasional husi Den Haag alerta ba Australia atu bele proteze testamunha. Kuandu tribunal presiza testamunha bele hato'o testamunha ninia depoimentu.

PM Xanana la kontenti ho Australia nia hahalok hanesan nasaun boot liu, riku liu no matenek liu. Hatudu mai, hatudu fali beikten. Ba asaltu fali testamunha nia uma no hasai sasan hotu no prende tiha pasaporte, hodi bandu labele sai husi Australia.

"Hau analiza situasaun ne'e hodi dehan, o tauk ga, o moe ga, o iha problema ga. See uluk dehan lae nusa mak hamosu fali problema ne'e,"PM Xanana kestiona.

PM Xanana hatutan, hasai tiha testamunha nia pasaporte, ne'e hatudu arogansia no falta moral, falta etika. Tuir Xanana pela premira vez foin rona, uza fali intelejensia militar ba rona problema bisnis nian.

PM Xanana husu ba sosiedade sivil, estudante no juventude sira atu manifesta sagradu ho atetudi Australia nia manobra tenki halo ho diak. Laos ba estraga, laos ba tolok. Hatudu katak, povu TL ne'e matenek.

"Hau husu ba jovens sira no organizasoens ne'ebe prepara-an atu halo manifestasaun, ba lao neneik fila ba uma. Hau lakoi hare vidru ida rahun, kareta ida rahun. Lae hau kaer. Tenki hatudu ba mundu katak, ita ki'ik, sei kiak, sei aprende, mais ita hatene hatudu ba mundu katak, ita matenek,"PM Xanana alerta.

“Hau preokupadu tebe-tebes ho ita nia testamunha. Hau tauk mak bele hamosu asidente trafiku ba ita nia testamunha (tabrakan mobil). Maibe ba sobu dokumentu no prende pasaporte, ne’e hatudu in moral,”Xanana komenta.

PM Xanana ho fiar an hodi foti nia liman los tau iha nia kbas karuk hodi dehan, 450 anos ho Portugal todan hela, no foti tan liman karuk tau ba iha kbas los hodi dehan, 25 anos ho Indonezia todan hela. PM Xanana ho fiar-an, foti liman lolo ba hirus matan hodi dehan, hau moris, hodi foti liman ba ulun dehan tan, ida sei la mai tur iha ulun ne’e.
